



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Illvstri Constantinopolitano Imperatori.

**urn:nbn:de:hbz:466:1-20020**

maneat, nos procedemus in ipso sicut videbimus expedire. Datum Signiæ v. Kal. Septembris, pontificatus nostri anno sextodecimo.

*ARCHIEPISCOPO, IUDICIBVS  
& Consulibus Beneventanis.*

*Epist. 103.  
De negotio  
Thomasi de  
Aquina.*

**L**icet nobiles vir Thomasius de Aquino cum sociis suis de mandato nostro captus non fuerit, volentes tamen indemnitati vestrae paterna sollicitudine praecavere, saepe vobis super hoc scripta nostra direximus, qualia pro tempore novimus expedire. Ipse vero, etsi quoddam modicum castrum germani nostri, quod dicitur Broccus, injuste detineat contra regiam iussionem, unde gratum nobis existeret si per vos ad illud reddendum posset induci, ut non vestrum solummodo commodum, sed etiam nostrum procuraretis honorem, liberationem tamen ipsius, qui propter hanc causam captus non fuit, nolumus impedire, sed vobis utique credimus profuturum si nobis curaveritis in hac parte deferre, ut nos propensius ad vestrum inducatum profectum, etiam si conditionem ipsius oporteret vos propter hoc in aliquo facere meliorem, cum per divinae miserationis auxilium potentes simus vobis in majoribus respondere. Vos ergo intellecto beneplacito nostro, tamquam viri providi & fideles, agatis quod utile fuerit & honestum, necessariam adhibentes cautelam ne circumveniri possitis; quia quantum vobis valeat compositio inter vos & illum tractata sine nostro favore prodesse, vestra, sicut credimus, discretio non ignorat. Datum Signiæ 111. Kal. Septembris, pontificatus nostri anno sextodecimo.

*ILLVSTRI CONSTANTINOPOLITANO  
Imperatori.*

*Epist. 104.  
Et commendat  
Legatum.*

**I**pse summus angularis lapis Iesus Christus, in quo omnis aedificatio constructa crescit in templum sanctum in Domino, Ecclesiae fundamentum & fundator existens, inter cetera quibus salutaria providit remedia populo Christiano ad consolidandam fidei unitatem, ut & unus pastor esset & unum ovile, sedem apostolicam totius Christianitatis caput instituit & magistrum; a qua sicut unguentum in capite, quod descendit in barbam Aaron, & ad oram etiam vestimenti, panis intellectus & vitae ad alias procedat Ecclesias, cum doctrina fidei & aqua sapientiae salutaris. Sanè pastor ipsius & rector, cum ab eo plus Dominus exigat cui plura committit,

ut in talento sibi credito negotietur utiliter, portat onera gravia cum plenitudine potestatis, sic in uno loco personaliter residens quod propter eventus plures & varios in spiritu per plura diffunditur & trahitur ad remota; quantoque magis potestas extenditur, tanto majori sollicitudine occupatur. Verum ne inter curas continuas & praegraves pro defectu imperfectiois humanae deficeret, si solus consumendus inani labore ad suam sollicitudinem omnia revocaret, attendens quod messi multae operarius unus non sufficit, multos sibi operarios & coadjutores adiungit, ac per eos exequitur quod per se non potest personaliter adimplere. Porro expedit ut cum fratribus onera partiatur, sic vices suas aliis committendo ut intelligatur ipsemet facere quod per alios fieri decernit, illius instructus exemplo qui discipulos suos in universum mundum ad praedicandum direxit. Cum igitur non solum necessitas Ecclesiae, sed etiam utilitas Constantinopolitani imperij postularit illuc a latere nostro destinari Legatum, nos ad exaltationem & commodum Ecclesiae pariter & imperij, necnon personae tuae specialiter intendentes, ut in missi persona mittentis notetur affectus, illum ad partes ipsas duximus destinandum quem inter fratres nostros speciali diligimus caritate, videlicet venerabilem fratrem nostrum Pelagium Episcopum Albanensem, virum literatum, providum, & honestum, nobis & fratribus nostris carum admodum & acceptum. Ipsum igitur magnum Ecclesiae Dei membrum, immo personam nostram in ipso, benigne recipias & honeste pertractes: cui nos vices nostras commisimus, ut iuxta verbum propheticum evellat & destruat, aedificet & plantet quae secundum Deum evellenda & destruenda, necnon aedificanda cognoverit & plantanda. Ipsius itaque salubribus monitis & consiliis reverenter intendas, de cuius circumspectione provida & providentia circumspecta plenam fiduciam obtinemus quoniam dirigente Domino gressus ejus sic via regia curabit incedere quod non declinabit ad dexteram vel sinistram. Datum Signiæ 111. Kal. Septembris, pontificatus nostri anno sextodecimo.

*In eundem ferè modum nobilibus viris Comitibus, Baronibus, & universis Christi fidelibus sub Constantinopolitano imperio constitutis, verbis competenter mutatis.*